



INUIT ATAQATIGIIT INATSISARTUNI

31. maj 2007

Inatsisartut Suleriaasianni § 36 imm. 1 tunngavigalugu Naalackersuisunut apeqquut imaattoq matumuuna saqqummiuppara:

Nuummi Tuapannguani piginneqatigiilluni inissiassat sanaartorneqarnerat pillugu apeqquut:
(Inatsisartunut ilaasortaq Agathe Fontain, Inuit Ataqatigiit)

1. Sanaartugassat taakkua pillugit Naalackersuisut qanoq naliliippat? Sanaartugassat ataasiakkaarlugit aamma ataatsimoortillugit naliliisoqarnissaa kissaatiginarpoq.
2. Tegnestuen Nuuk-p isummersuutai tunngavigineqassappata, blokkini inissiat pioreersut Q-, R-aamma S-miittut isaterneqarnissaat aamma nutarterneqarnissaat ataatsimut isiginiarlugu kiisalu kvadratmeterikkaamik qanoq akeqassagalarpa?
3. Tuapannguani imaluuniit Nuummi blokkini allani qaliaasa qaavisigut inissialiortiternissat isumaliutigineqarnikuua? Taamaattoqarsimappat isumaliutaasut taakkua pillugit annertunerusumik nassuiaasoqarnissaa kisaatiginarpoq, kiisalu taamatut suliniuteqarnissami aningaasartuutit qanoq amerlatiginissaat pillugu annertunerusumik nassuiaasoqartariaqarpoq?
4. Tupannguani suliniutaasup aalajangiiffigineqavinnissaa sioqqullugu Tegnestuen Nuuk-mit isornartorsiutaasoq sooq Naalackersuisunit pisortatigoortumik oqaaseqarfigineqarsimangila? Apeqquummut tunngavigineqarpoq 2007-mi Sermitsiami nr. 17-imi aamma nr. 18-mi pineqartut assigiingitsut siuliani taaneqartut pillugit saqqummiussat.
5. Naalackersuisut suliamut tunngassuteqartunik soqutiginartunik allanik saqqummiussisinnaappat? (Inatsisartuni ilaasortaq Agathe Fontain, Inuit Ataqatigiit)

Tunngavilersuut:

2007-imi maajip 28-iani Aningaasaqarnermut Ataatsimiititaliami amerlanerussuteqartut Inuit Ataqatigiit ilaanatik Nuummi Tuapannguani blokkit Q-, R- aamma S-ip isaterneqarnissaannut pisortatigoortumik tunngavissiaq kingulleq akuerivaat.

Taamanna sioqqullugu akuersinnginnermi Tegnestuen Nuuk-mit allakkiaq ilanngussaq kiisalu annertunerusumik paasissutissat Ataatsimiititaliap tigunikuuua.

Allakkiami atuarnaqarsinnaasutut Tuapannguani isaterinissap ataatsimut isiginiarlugu naleqquttuunera aamma imminut akilersinnaanera qularnartoqartinneqarpoq.

Allakkiami uparuaatit pingaarnert makkuupput:

- Blok T-mi pitsaassuseq blok Q, R aamma S-imit ajornerungarpoq, taamaattumillu blok T-p nutarterneqarnera blok Q-p, R-ip aamma S-ip nutarterneqarnissaanut akilersinnaassutsimut missingiinnermut tunngaviusinnaanani.
- Pissutsit aallaavigalugit blok T-p nutarterneqarnera naatsorsuutigisamit akisunerungarpoq, Ineqarnermut Ataveqarnermullu Naalackersuisoqarfimmi naalackersuinikkut pissutsit "nikerartumik" ingerlanneqarnerat pissutaalluni.
- Pissusiviusut tunngavigalugit Tuapannguani qulerikkaanik inissiassanut Naalackersuisut pisortatigoortumik missingiuusiaat tunngavigalugit akigitinneqartussaq kvadratmeterimut kr. 9.000-it missaanni akisunerussaaq, blokkit maannakkut napasut nalingat aallaavigissagaanni. Taamaattumik pissuiviusut tunngavigalugit kvadratmeterimut akiusoq kr. 27.000-it tungaanut annertussuseqalissaaq. Sanilliussissagaanni Ilimmarfimmi akiusoq kvadratmeterimut kr. 20.000-it missaaniippoq.
- Nuummi Narsarsuaaqaami blokkit blok Q-, R- aamma S-mit ajorneroqisut piiarneqarnissaat kinguaattoortussavoq, Narsarsuaaqaami inissiat (aamma) blok Q- aamma R- ineqartunut inisseeqqinnermut atorneqassammata.
- Blok Q-, R- aamma S-imi inissiat maanna piusut Kangerluup tungaanut isikkivigissorsuupput. Inissiassani quleriiaani sanaartorniarneqartuni inissiat taamaallat affaat Kangerluup tungaanut isikkiveqassapput, sisamararterutaallu ilaannakortumik immap tungaanut isikkiveqassaluutik. Sisamararterutaat sinneruttut Raadiup Qaqaani toqqavinnut aamma Saviminilerinermik Ilinniarfiup tungaanut isikkiveqassapput. Qularnanngivissumik inissiat sinneruttut taakkua tuniniaruminaatsuussapput. Tamanna pissutaalluni inissianik immamat isikkiveqanngitsunik pilersitsinissaq tupinnakuluppoq.
- Nuummi inissiat ataatsimut amerlinissaannut orniginartuussaaq aamma pisariitsuulluni blokkit maanamut pioreersut qaliaasa qaavanni inissialiornissaaq.
- Taamaaliorneq blok Q-, R- aamma S-ip isaterneqarnissaannit orniginarnerussaaq, tamatumalu kingorna taakkua nutarterinermi akiusup nalinganut maanna ineqartuusunut tuniniarlugit, soorlu Attartortumiit piginnittumut aqqissuusinermi pissusiusut tunngavigalugit.

Apeqqutit uku tiguneqarnerinit ullut qulit ingerlaneranni akineqarnissara piumasaraara.